

7
*EXERCITATIO MEDICA
IN AUGURALS,*

QUAEDAM

DE VENTRICULO
COLLIGENS.

EXERCITATIO MEDICA
INAUGURALIS,

QUAEDAM

DE VENTRICULO
COLLIGENS.

QUAM,

FAVENTE SUMMO NUMINE,

EX AUCTORITATE RECTORIS MAGNIFICI,

EDUARDI SANDIFORT,

MED. DOCT., MEDICINAE, ANATOMES ET CHIRURGIAE,
PROFESSORIS ORDINARIJ.

NEC NON

Amplissimi SENATUS ACADEMICI *Consensu,*
& *Nobilissimae* FACULTATIS MEDICAE *Decreto,*

PRO GRADU DOCTORATUS,

Summisque in MEDICINA Honoribus ac Privilegiis
rite ac legitime consequendis,

Eruditorum examini subicit

JACOBUS ATHILL,

ANTIGUENSIS.

Soc. Reg. Med. Edin. Soc.


—— ——— Levius fit patientiâ
Quicquid corrigere est nefas. — HOR.

Ad diem XXVIII. Octobris MDCCLXXXII. H. L. Q. S.



LUGDUNI BATAVORUM,
APUD FRATRES MURRAY,

MDCCLXXXII.



ERRATA

PRAESENTIM NOTABILIA.


P. 4. l. 4. Pro potest *lege* possunt.

— — — 6. — coeunt — coire.

— 15. — 27. — profunt — prodest.

— 20. — 26. — proprius — propius.

— 22. — 11. — facie — faciei.



H O N O R A B I L I

JACOBO MAKITTRICK
A D A I R, M. D.

JUDICI APUD ANTIGUENSES INTEGERRIMO,
CURATORI SUO ET FAUTORI PLURIMUM COLENDO;

V I R O

ERUDITISSIMO ET HUMANISSIMO;

IN REVERENTIAE SUAE ET GRATAE,
ANIMI ERGA SE ET SUAM DOMUM PATERNISSIMI,

MEMORIAE TESTIMONIUM,

HAS STUDIORUM PRIMITIAS
(SI TALI OPUSCULO NOMEN TANTUM
LICEAT PRAEPPONERE)

HUMILLIME

D. D. D.

A U C T O R.

PROŒMIUM.

*M*ihi, scilicet in subtili & profundâ admodum medicinae scientiâ minime versato & quasi tyroni, Academiae cum a suorum doctrinâ alumnorum, tum a gravi judicio & justâ dignitatum dispensatione plurimum ut fas est celebratae, medicos ambire honores, audacius mehercle & pene temerarium videtur: vetus tamen & pulchra sententia ea, quod quo magis difficilia sint acquisitu praemia, eo magis quaesitu digna, & acquirenti honesta, accendit me & fortiores reddit.

E materiâ vero ita copiosâ & pene infinitâ, & hinc indeque a peritissimis pertractata, particulam quandam, de quâ pauca mea puerilia satis & nugatoria societati eruditissimae offerre audeam, eligere, dubio mihi curae est perquam sollicitae. Mente tamen meâ corporis humani structuram, partium ejus singularum officia, & morbos quibus unaquaeque est obnoxia diu revolventi, & de iis quibuscunque aliquantulum prolaturus, attentionis revera meae utpote praecipue dignus mihi occurrit VENTRICULUS; eoque magis, quod Physiologiam ejus & Pathologiam ab alieno simul collatas vidisse non memini. Continuo autem & tenaci animo habendum esse precor, quod munus hoc non ultro aggredior, sed mihi necesse est imponatur.

Verum enim vero quoniam mihi attentius eam circumspicienti in tot tantaque brachia se resolvere videtur quaestio, methodum certam quandam & simplicem, cui in eâ agendâ haud laeve insexiri fortasse possit, majorem in perspicuitatem institui & opusculo meo praeposui.

P R O Œ M I U M.
S Y N O P S I S.

Caput. I. De Anatomia Ventriculi.

1. De Situ & Figura.
2. De Structura.
 - a. De Tunicis.
 - b. De Orificiis.
 - c. De Vasis sanguiferis.
 - d. De Nervis.
 - e. De Glandulis & Secretionibus.
 - f. De Lacteis & Lymphaticis Vasis.

Caput. II. De Physiologia Ventriculi.

1. De Appetitu.
2. De Cibo.
3. De Ciborum concoctione.
4. De motu Ventriculi peristaltico & ciborum propulsione.

Caput. III. De Pathologia Ventriculi.

Sect. I. De Affectionibus Ventriculi Idiopathicis.

1. De Gastritide.
2. De Dyspepsia & Hypochondriasi.
3. De Chlorosi.
4. De Pyrosi.

Sect. II. De Affectionibus Symptomaticis.

1. De Consensu partium in genere.
2. De signis a Febre.
3. ——— a Podagra & Haemorrhoides oriundis.
4. De aliis quibuscunque Ventriculi Sympathiis.



EXERCITATIO MEDICA
INAUGURALIS,

QUAEDAM

DE VENTRICULO
COLLIGENS.



CAPUT PRIMUM.

De Ventriculi Anatomia.



um in sequentibus paginis ad varias ventriculi partes saepius necesse est referatur, paucissimis quidem verbis ejus structuram, & partes ex Anatomia investigatas, utpote attentionis meae dignissimas exponere, imprimis decrevi.

DE SITU ET FIGURA VENTRICULI.

In organi ita conspicui & simplicis situ & figurâ exponendis, multis minime opus erit verbis. Sufficiat igitur brevi referre quae aut ipse observavi, aut ex auctoritate gravi ducenda curavi, quaeque e cadaverum sectionibus omnibus patent.

A

Ven-

Ventriculus faccus est in Epigastrio ut loquuntur anatomici, partim etiam in utroque sed praecipue in sinistro Hypochondrio, extraverso & sub Diaphragmate situs. Est autem ovatus, ex parte sinistrâ largus quidem & capax, gradatim versus dextram se minuens; incurvatur etiam & in duas fornices vel curvaturas est distributus, quarum una MAJOR, quae magnam complectitur convexitatem, altera quae parvam MINOR dicitur. Duobus etiam instruitur orificiis, *superiore & inferiore* ab antiquis rectè dictis; hoc quod e dextrâ ventriculum cum intestino duodeno necit, PYLORUS, illud ab Aesophago proveniens & fere in medio situm, CARDIA, audit. Pylorus autem, non omnino in Hypochondrio dextro, sed potius in Epigastrio, dextrorsus tamen, situm habet, nec longè distat a Cardiâ; etenim ventriculus e dextrâ mediam versus, curvaturas praedictas facturus cursum vertit. Hinc facilius videre possumus, ventriculi a cibo distenti fornix magnam, abdominis parietes, vertebrae dorsales parvam respicere debere.

Notandum est etiam quod ipsius superficierum ventriculi una superior, altera inferior, necesse est dicantur; & rectè a Cel. WINSLOW monemur, cardiacam in illâ, in hac verò pylorum esse situm; unde non absque gravi ratione infert, quod in homine vivo stomachus praesertim plenus cum Aesophago non rectam lineam, sed cum istâ ejus parte ultrâ diaphragma positâ, angulum faciat: & hinc quod orificium superius, fornixque parva versus vertebrae spinales vertantur, dubitari nequit.

DE STRUCTURA VENTRICULI.

Partium e quibus stomachus constat natura & dotes expositae, pretium operae procul dubio afferent, cum ex illis phenomenon illud mirum & vitae perquam necessarium APPETITUS, aliaeque meherclè hujus organi functiones, quomodocunque pendeant. Partes nimirum eae sunt variae, primo autem considerandae sunt quibus nomen TUNICAE ab Anatomicis est impositum. Quae quidem

dem ab HALLERO sex, a WINSLOW & aliis quatuor solummodo numerantur: Hi enim tunicas tantum proprias complectuntur, ille telam cellulofam condensatam & ubique partes nectentem superaddit.

TUNICAE PROPRIAE SUNT COMMUNIS, MUSCULARIS, NERVOSA, ET VILLOSA.

COMMUNIS quae & Peritonea vocatur, processus est & vere pars elongata peritonei, quod miris in modis post tectas undique abdominis parietes, viscera ejus omnia involvit, tunicam unicuique propriam, simul ac omnibus communem praebens; ita meherclè ut manu introducta, nihil est nisi membrana ea quod possit tangi. Huic nimirum, quippe forti & firmae membranae multum roboris debet stomachus.

Haecenus structura simplex est, & intellectu facillima; MUSCULARIS magis complexa ex variis fibrarum laminis evidenter constat. Attamen bifaria apud WINSLOW mihi cordi est earum divisio: una externa & e fibris longitudinalibus, interna altera & e fibris circularibus, constituitur.

Cum verò de situ fibrarumque cursu muscularium clarè aliquid & luculenter verbis exprimere difficillimum est, & vires meas longè excedit, paucis iis & vix inchoatis quae supra dixi necesse est me habeam contentum; nec ut plura inde addam decet morari.

NERVOSA musculari est proxima: latere ejus externo seu convexo videntur undique vascula exigua fere innumera, cum nervis implexa & rete referentia: Interno autem structura spongiosa potius & tenuis, glandulis plurimis exiguis instructa apparet. At verò quo pars ita constructa muneribus ordinariis possit fungi, fibrae ligamentariae ut censet WINSLOW fundamentum quasi & auxilium dantur.

VILLOSA huic imposita internam ventriculi superficiem constituit: Atque ita audit, quòd aqua immerfa faciem undique villosam prae se fert: Hanc autem a vasculis nervisque ubique in eâ sparsis

pendere, ex anatomicorum injectionibus satis patet. In hâc tunica orificia vel demum pori, glandulis praedictis pares, vel secundum HALLERUM e folliculis mucosis exeuntes, oculo bene attento, ex omni parte potest videri. Notandum est autem, interiores duas tunicas multo magis amplas esse quàm exteriores; rugasque quibus undique interna ventriculi superficies stipatur ad formandas coeunt.

De ORIFICIIS quaedam exinde dicantur oportere mihi videtur. *CARDIA* ad sinistram ventriculi, ubi Aesophagus terminatur, partem, corporis autem mediam, locum habet; & quò alimentorum in gulam difficilior foret redivus, structurâ musculari propriâ instruitur. *PYLORUS* dextrorsum ad fornicis minoris finem situs, ut nomen videtur indicare, species est sphincteris, contractilibus admodum fibris muscularibus instructa: praeterea quod in muscularis tunicae structurâ circa orificium hocce, circularium fibrarum constructio quaedam peculiaris a plerisque notatur; Duodeno adnectitur, ità ut per eum facillè transeant alimenta ex ventriculo; at verò quo redivus ex intestinis difficilior fiat, apparatus valvulam bene referens ex tunicarum nervosae simul ac villosae plicâ constitutus, fibrisque insuper stipatus muscularibus, additur. Rebus tamen ità sese habentibus hoc orificium secundum Ccl. WINSLOW, superstite vitâ nunquàm penitus occluditur.

Princeps ventriculi *ARTERIA* primus est Caeliacae ramus, & dicitur *Coronaria*, quippè quòd rami ramos inter se invicem osculantur, & cum *Pyloricâ* & *Gastricis* adeo conjunctos se habeant ut arcum vel, ut anatomici malint, coronam facere videantur. *Pylorica* & *Gastrica* dextra Hepaticae arteriae sunt rami, *Gastrica* autem sinistra splenicae, has verò ab eâdem provenire Caeliacâ neminem fallit.

VENAE arteriis praedictis respondentes eidemque legi inservientes, a venâ portarum (a Mesenterica majore scilicet, Splenica & Haemorrhoidali internâ) oriuntur, & sanguinem a ventriculo reducem ad vasa majora, & demum ad cor ipsum reddunt.

NERVI nec numero pauci, nec facile discernendi sunt, ideoque

que qui hoc in loco clarè describantur difficillimi. A pari autem vago sive sympathetico praecipuè progrediuntur, & ubique texturae ventriculi copiosissimè adhaerent: unde ea mira quâ induitur sensibilitas, is cum tot tamque distantibus corporis partibus consensus, ut sympathiae sedes & origo ab Illustri J. HUNTER, animaeque ipsius ab aliis, locus habeatur.

SECRETIONEM mucij cujusdam esse in ventriculo, neminem vix unquam latuit. Hodiernis verò ejus virtutes cognitae laudi sunt & gloriae. Liquori sane in ventriculo invento nulli alio esse usui quàm quo cavitatem ab acribus defendat, vetus erat opinio; hodiè autem ab experimentis, quod in eo cibos solvendi & eorum coctioni interveniendi facultas sit, satis patet. Sed unde vel quo fiat ille liquor haud ità satis liquet. Esse in nervosâ tunicâ glandulas innumeras ex auctoritate accurati illius WINSLOW antea dixi; eas nunquam mihi visas lubens agnosco, & existantne an sit alia secernendi ratio penitus ignoro. Ab HALLERO ex vasculis illis exilibus in tunicâ villosâ, ut supra posui, fitis, emanare dicitur liquor gastricus. At verò se poros in tunicâ villosâ exiles vidisse, terminos in folliculis telâ cellulosa infitis, ut inquit, habentes, ipse agnoscit. Mihi igitur cum WINSLOW super hac re censere magis cordi est, nempe quod secretio a glandulis fiat; & hoc potius quod Dom. J. HUNTER, mihi roganti unde sit haec secretio, superficiem ventriculi internam glandulis ubique esse instructam conglomeratis, vel etiam ex toto organum secretorium dici posse, se credere aiebat. Haecine autem sola est in organo tam insigni secretio? Nonne mucos aliquo ad ipsum ventriculum a viribus succi gastrici defendendum opus est? Certè mirum omnino videtur liquorem illum, animalium etiam durissimas qui facillè solvat partes, ità ventriculo, organo licet molli atque tenero, quasi pietate affectum parcere, ut vitâ superstiti ne minimâ quidem afficiat injuriâ. An verò hoc a mucos alio peculiari stomachum habitanti, eumque defendenti; an a vulgari quae in aliis corporis cavis invenitur secretionem, an, ut inquit Celeberrimus J. HUNTER, a principio vitali oriatur, me penitus nescire fateor.

De Anatomia nihil ultra nisi pauca de VASCULIS ABSORBENTIBUS stomachi restat dicere. Utrum talia verè sunt vasa inter Anatomicos minime convenit: cum autem laboribus auctorum quorundam hodierni temporis & praecipuè DOM. CRUIKSHANK, qui super hâc re multum operae & cum maximo sibi honore, aliisque commodo largitus est, vasa absorbentia aequè ac sanguifera ordini cuidam certo succumbere posse verisimile redditur, nullus dubitem quin ventriculo aequè ac aliis corporis partibus talia sint. Porro autem HALLERUS inquit se ea & ne parva quidem ex partibus quibusdam visceris hujus oriunda & per canalem ampliorem ductui thoracico connexa vidisse: Quinetiam in Collectione Hunterianâ omnium qui sunt & qui fuerunt facilè princeps, plura sunt exempla, quibus haec vasa ubique in superficiebus ventriculorum arte praeparatorum, injecta videri possint.

Objici forsân mihi potest, peractis eis quae adhuc quam brevissime tractavi, nihil de Anatomia comparativâ me dixisse. Cum autem hanc argumenti partem curiosam magis quam utilem, & quae opusculum hocce longè ultra debitos extenderet limites considero, quamvis in animo eam tractare ex initio fuit, nunc omnino praetermittere statuo.



CAPUT SECUNDUM.

De Ventriculi Physiologiâ.

Corpus humanum a munerum functione suorum oppressum, citò necesse est deficeret. Motus enim omnis partes solidas terit, fluidas dissipat; utraque etiam sponte & quidem brevi putredine solverentur. Rebus autem ita sese habentibus cibum appetimus, sumimus, & concoquimus; corpus nutritur; putredini obviam itur. Insuper animalium corpora, initio admodum parva, lapsu temporis magna fiunt ultra fidem, quod nullo alio possit fieri modo quam per ingestos concoctosque rite cibos. Appetitus igitur, cibus, concoctio, & denique motus ventriculi peristalticus qui considerentur digni videntur.

D E A P P E T I T U.

Appetitus, vel cibi desiderium, est sensus ingratus, dolens, quasi lacerans, primo levis, paullatim ingravesceus, & ventriculo relatus.

Variae de ejus causâ variorum sunt opiniones: aliud Mechanici, aliud Chymici, aliud denique isti autumantes qui structuram corporis animalis propriam, potestatesque ejus motrices in animo vertere consueverunt.

Ventriculo jam inanito censebant quidam, plicas antea dictas tunicis nervosâ & villosâ constitutas, nervis interpositis sensiles admodum redditas, inter se collidentes, & diaphragmate, musculisque abdominalibus una comprimantibus adjutas, sensum intolerabilem in ventriculo cui cibus solum erat remedium excitare; hisdem etiam visum est liquorem gastricum post pastus collectum, acremq. redditum sensationem hanc magnopere inducere.

Alia

Alia opinio hujus sensationis, acria in ventriculo ex priore pastu relicta, sive acida sive putrida, in causa esse voluit. Tertia etiam a SENNERTO sustentata est quod appetitûs causa proxima sit suctionis illius quâ venae meseraicae inanitae chylum attrahere & e ventriculo quasi exsugere existimabantur. Causae verò omnes eae, perpetuò necesse est existant & augeantur; modo tamen sentitur, modo omnino deficit appetitus, circumstantibus ne minime quidem mutatis.

Ventriculi tandem inanitio, quamvis ex parte ab eâ oriatur sensus qui appetitus audit, phenomena ejus omnia non potest praestare; namque inanitione per vomitionem facta non statim esurit homo: exinanitio aliqua totius corporis & praecipuè vasorum in cute sanguiferorum multum valet; in febribus verò, non solum ventriculus sed saepius etiam totum corpus quodammodo inanitur, nec adhuc appetit aegrotus. Itaque ut fiat appetitus, contractione quâdam muscularium fibrarum ventriculi opus esse videtur, ex inanitione forsan partim ortâ, sed a tono & totius systematis vigore potissimum pendente. Hinc famis sensus ventriculo etiam non vacuo ex causis stimulantibus oritur; hinc in morbis febrilibus aliisque atoniâ comitatis, appetitus deficit, quod alioquin explicari nequit, quoniam irritabilitate in his omnibus in genere auctâ nervi ab acribus & attritione praecipuè afficerentur, & inanitio quae supra dictos ferè semper consequitur, suctionem exaugere debet; hinc denique quomodo exercitium, balneum frigidum & medicamenta tonica famem excitare & acuere, debilitantes vero causae (inter quas nimia fibrarum muscularium contractio, ex appetitu diutius urgente, ponatur oportet) eandem deprimere solent, plane discimus.

Quoniam sitis potius ex faucium & linguae quam stomachi flatu pendere videtur, de eâ penitus taceo.

Et genere & mille aliis diversitatibus variat cibus. Diaetâ ex animalibus cum vegetabilibus constante gaudet homo. Talem illi esse a naturâ indicatam docet instinctus; docet etiam ventriculi structura & intestinorum (a); docent denique dentes ad utramque manducandam aptissimi: Quin etiam laborantibus & forti inservientibus exercitio, alimentum nequaquam sufficere videtur vegetabile. Praeterea in regionibus ubi animalia plurimum victui inserviunt, plures sunt fortes, plures longaevi, quam in iis quibus incolae vegetabilibus magis copiose utuntur.

Inter animalem & materiam vegetabilem summum hoc videtur esse discrimen, quod illa multo magis nutrimenti quam haec praebet. Utraeque eadem fere principia, eaque nihil a sanguinis humani principiis differentia, varie vero commista continent (b). Praecipua inter eas differentia videtur esse quod illa in ventriculo satis cito, vel perfectius non concocta, putredinem, haec aciditatem acceptura est: utraeque eosdem effectus, debilitatem scilicet ejusque sequelas, illa vero plus quam haec, inferunt. Conjunctim sumptis, mala illa magnopere evitantur, ideoque ubique ferè terrarum commistae sumuntur: nec ut liceret expectare a tali misturâ abhorret natura; porro tali potius gaudere videtur. Etenim cibus a naturâ nobis infantibus paratus, ventriculis adhuc imbecillibus, plu-

(a) In animalibus carnivoris alia est ventriculi structura, alia in graminivoris; intestina etiam & praecipue *Caecum*, quodammodo inter se differunt; hominis autem ventriculus & intestina, neve uni neve alteri solum accommodata, utriusque structuram partiuntur.

(b) In praelectionibus suis de oeconomia corporis humani Cl. G. FORDYCE M. D. haecce habet verba. „ *Every animal & vegetable substance contains the same elements; If you distill animal matter you procure volatile alkali, water, Empyreumatic oil, Gas, Inflammable air & a charcoul which being burnt in the open fire will produce a calcareous earth; now as these are the parts of all animal substances it is evident they must all have the same elements; also if we distill a putrid vegetable substance, we shall get the same product.*

plurimo tamen desiderato nutrimento, non simplex, sed variis compositus partibus, inter se plurimum discrepantibus, evadit. Lac scilicet ex aquâ constat, in quâ solvuntur 1°. Materies coagulabilis, aliarum instar animalium mucilaginum ad coagulandum proclivarum. 2°. Oleum expressum 3°. Saccharum. Res inter se proprietates diversas admodum continentes, omnes tamen hâc unâ gaudentes, quod in nutritionem plurimam conferant. Propria pars vi succi gastrici simul ac ventriculum ineat, coagulatur; oleum ejus solutionem aliter difficillimam promovet, saccharo ejus ad putredinem proclivitatem una corrigente. Oleum autem expressum sine mucilagine vix concoqui posse, saltem non sine nisu corpori nocivo ab ill. G. FORDYCE non absque gravi ut opinor ratione dictum, accipio: ad Saccharum etiam solvendum talem commistionem non minus utilem facile possum credere. Haec omnia naturam cibi simplicitate non gaudere satis probant; quin etiam ex eisdem duci possit, cibum satis nutrimenti praebere non posse, nisi in ventriculo per aliquot tempus detineatur, ibique mutationes quasdam subeat.

Neve animalia neve vegetabiles in genere nisi prius quodammodo coctas depascimus, omnia vero quibus cibo utimur, mitescunt flammâ & molliuntur. Vegetabilium universum fere genus uno eodemque modo plerumque parantur; animalia autem vel immediate vel interventione fluidi cujusdam, igni applicata vel demum aquâ soluta, curantur. Illac superficies externa praecipuè coagulatur, adeo ut succi partium internarum non dissipantur, & oleum essenziale stomacho praesertim debili molestius, retinetur; hac succi & oleum essenziale magis deperduntur, faciliorque concoctio redditur. Postero autem parata modo citius & ventriculo defluunt, nec ejus actioni subeunt, nec demum corpus satis nutriunt, alimenta.

Quod ad varietates ciborum pro aetate, temperamento &c. attinet, Hygieinen spectat; hic autem liceat dixisse quod infantibus impuberibusque alimenta blanda, concoctu facilia, nutritioni aptissima esse debent: ea verò quae sumunt puberes aequo facilius digeri
pos-

possunt; itaque ne stimulent nimis cibi, nec nimis abundant, sufficiat curare; homine jam adulto pro ratione laboris, temperamenti, & corporis habitûs, nunc magis stimulantia, nunc penitus refrigerantia capiantur oportet; senes denique plus stimuli requirunt.

In plerisque morbis alimentum nec ventriculus appetit, nec accipere debet. Convalescentibus & aliquando eis qui chronicis quibusdam morbis laborant *diaeta nutriens*, eademque concoctu facilis, adhibita, maxime prodest.

Fossilia quaedam & nonnulla vegetabilia quae parum vel nihil per se nutriant, pro *CONDIMENTIS* sumuntur, & suis usibus nequaquam carent, saepius enim fortior optandus est sapor; quin & ventriculo stimulo sunt & sic concoctioni, praesertim si debilior fuerit stomachus, opitulantur; neque bene concoquitur, si condimenta solita negantur.

DE CIBORUM CONCOCTIONE.

Recepta in corpus alimenta non statim nutritioni aptata, mutationes quasdam est necesse subeant. Primum cibus actione dentium, linguae, aliarumque oris partium comminutus, mollitus, & demum per oesophagum ope forsan peristaltici motus depulsus, in stomachum transit, ibi per aliquantum temporis mansurus; ibi demum concoquendus. Eae quae ad nutritionem promovendam actioni ventriculi subjiciuntur, materiae, sunt farinacea; vegetabilium mucilaginosae; acidum vegetabile nativum; saccharum; oleosa; materia animalis; nec vel minimè interest an horum tantum uno, an omnibus simul utimur; omnia enim corporis humani elementa in se adeo continent, ut nullo alio opus est ventriculi labore, quam quo ea dissociat, atq. iterum ita inter se nectat, ut chylus & demum sanguis ex eis fiat. Quomodo autem hoc fit variae ab auctoribus dantur rationes. Trituratio ab his; ab illis fermentationes ordinariae; calor, & agitatio & demum solutio, ab aliis ordine proposita sunt, & ut opinor ferè refutata.

At vero a trituratione solâ alimentorum natura & proprietates nequaquam possunt mutari. Si quamlibet materiam vegetabilem, aquâ, salivâ, vel succo gastrico, si fieri possit commistam, in sacco stomacho simili, calori grad. 98. admoveamus eamque satis agitemus & comprimamus, aut si vegetabilis cum animali commista fuisset materies, fermentationis stadiis ordinariis solent succumbere; res autem animales ita solae adhibitae statim putridae fiunt; at verò in coctionis alimentariæ decursu, ventriculo nullo laborante morbo, nec vinum, nec acetum, nec denique putrefactio percipietur (c). Quin etiam putredini jam inceptae ire obviam ventriculi liquores, experimentis probatur.

Calorem autem cum agitatione effectus concoctioni similes non promovere suprâ procul dubio patet. Denique ab experimentis de industriâ institutis, menstruum esse in stomacho quod cibos etiam maxime solidos facillimè solvat, satis probatur: solutionem igitur talem magnopere ad concoctionem conducere nullus dubito; esse autem rem ipsam quam concoctionem appellemus, concedere non possum; solutio enim alimenti cujuslibet, etiam ex animalibus conferti a chylo longè latèque distat.

Cibus igitur nec trituratione, nec fermentatione ordinariâ, nec calore, nec denique simplici solutione in chylum redigitur. Stomachus autem alimentis acceptis & succo suo proprio solutis *fermentationem sui juris* & adhuc minime imitandum, exhibet; cujus merclè vi unumquodque alimentum primaria sua elementa exuere cogitur, & de novo constitutum fit chylus.

Varia tamen alimentorum genera hâc fermentatione non aequè in eodem tempore afficiuntur; nec aequè dum concoquantur, corpus ipsa ea afficiunt: non tamen quo citius eò facilius solvuntur aut mino-

(c) Si ventriculus tandem debilis est, si nimis pro rato ejus vigore adhibeatur cibi, denique si alimenta animali cuidam insolita & naturae suae non aptata, praebemus fermentationum effectus ordinarii sentiuntur.

nori sunt stimulo, nec pro ratâ nutriunt facillimè concoctâ, ideoque pro viribus ventriculorum diversis alimentis variâ facilitate concoctis. est opus.

*DE MOTU VENTRICULI PERISTALTICO
ET CIBRORUM PROPULSIONE.*

Ventriculi duabus fibrarum muscularium lamellis constituti motus ex actione complexa constat. Utraeque lamellae dilatatione stimulentur necesse est, fibras igitur circulares alternè dilatari & contrahi certum est. Quamvis autem motûs hujusce cursus a sinistrâ versus dextram factus est, quae in stomacho contineantur non eo statim depelluntur. Ut concoctio ritè perficiatur ingesta in stomachum, ibi quid temporis detineantur oportet; quapropter dilatatione aliquâ fibrarum circularium, eâ praecipue quae a plenitudine oriatur, longitudinales contrahuntur, quo bina approximant orificia necesse est. Hinc Pylorus elevatus (propriâ forsan musculari structurâ majore vi ad se contrahendum simul excitatâ) magis impervius redditur. Reiteratis autem his motibus & compressione diaphragmatis cooperante, resistentia ejus tandem superatur, partes fluidae illius antrum occupantes, primò exeunt, solidiores, aere per ventriculi actionem evoluti, leviores factae ad cardiâ adnatant, nec nisi post aliquot tempus propelluntur. Pylorus tandem ventriculo quodammodo inanito, & contractionibus imminutis, laxior fit & minus elevatur & tandem alimenta facile finit progredi, viribus suis contractilibus a tergo ea quae tardiora sunt propellens.



CAPUT TERTIUM.

De Ventriculi Pathologia.

S E C T I O I.

De Affectionibus ventriculi Idiopathicis.

Morbi Idiopathici quibus affici solet stomachus adeo extenduntur ut ad singulos diffusè tractandos limites tentaminis hujus minime sufficiant: liceat igitur quam brevissime observata tamen pro viribus perspicuitate, eos percurrisse.

GASTRITIS duplex est, *Phlegmonodaea* scilicet & *Erysipelatosa*. *Phlegmonodaea* signis sequentibus annotescit; calore scilicet & dolore epigastrii acuto, cum Pyrexia typhode, vomitu, ingestis quibuslibet aucto & saepius cum singultu. Pulsus plerumque subdurus est, saepissime parvus, & non raro etiam debilis; vires multum imminutae sunt; incedunt summa anxietas, delirium, extremorum refrigeratio, spiratio difficilis, mors.

In omni Inflammatione impetus humorum auctus in vasculis sanguiferis, ex eorum actione aucta oriundus, inest; hanc igitur quodcunque excitat, morbi causa proxima evadit. Obstructio vasorum parvulorum aliquando hujus in causa esse potest; at vero diuturnam arteriarum actionis adauctionem spasma fere semper plus minus inniti ab Illustrissimo CULLENO dictum lubens accipio.

CAUSAE REMOTAE sunt vel *externae*, quales sunt contusio, acria & nimis frigida in stomacho recepta, nimia distentio &c.; vel *internae* quales numerari queant partium vicinarum inflammationes; acria vel in aliis partibus procreata & in ventriculum infusa, vel in seipso orta; variae denique affectiones sympatheticae, veluti Exanthematia, Podagra &c.

Mor-

Morbus hic si non subito eveniat lethalis ire solet vel in resolutionem vel suppurationem vel gangraenam. Proclivitas ejus ad horum alterutrum a symptomatum gradu & duratione & a signis facillime potest dignosci.

Morbi hujus curationem incertam admodum esse omnes fere fatentur medici. Illi autem utpote cui citius subit mors, statim omnibus quibus potimur remediis obviam eundum est. Venaesectio licet pulsus arteriarum parvi quidem & debiliores sint, plurimum praestat. Postea juvat epispaticum epigastrio amplum applicatum; nec totius foveae abdominis, tepidaque pedum lavatio suis carent usibus. Medicamenta ipse stomachus propter vomitum frequentem vix accipiet, potus autem tepidi, admodum blandi, parce & frequenter adhibeantur necesse est. Refrigerantia etiam, sedantia & praecipue laxantia si opus sit, in alvum injici queant, & dolore & vomitu per intervalla, ut aliquando fit, subeuntibus enemata anodyna multum profunt.

Gastritis erysipelatoza cum nonnunquam sit sine pyrexia non semper facile dignoscitur. Pyrexia autem nulla instante, morbus per oesophagum ad pharyngem & fauces denique ipsas diffusus aliquando apparet. Rebus ita sese habentibus, si ventriculus insolita acrimonia, ut mos est, sensibilitate simul afficiatur, morbum huncce adesse certiores facti erimus.

Causae excitantes plerumque sunt acrimoniae in ventriculum quodammodo receptae; quorum a natura & a signis praesentibus *cursus* pendet. Si acrimoniae adhuc stomacho inesse ducimus, copiosa liquorum blandorum tepidorum potio ad vomitionem provocandam, causasque amovendas, praecipue profunt. Demulcentia etiam & corrigentia (atque ea si fieri potest *specificae*) adhibeantur oportet. Si ex aliis retropulsis, ut saepissime accidit, oriatur morbus, illi assidue revocandi sunt. Denique si signa inflammatoria multum invalescant, ad remedia supra praescripta gradu proprio decurratur.

DYSPEPSIAE a CULLENO in synopsi sua prodita, mihi ante alias
ma.

magis cordi est definitio. Quam igitur hic lubens accipio. „ Anorexia, Nausea, Vomitus; Inflatio, Ructus, Ruminatio; Cardialgia, Gastrodynia; pauciora saltem vel plura horum simul concurrentia, plerumque cum alvo adstrictâ & sine alio vel ventriculi ipsius vel aliarum partium morbo”.

Optimus hic est & morbi character & symptomatum relatio; restat solummodo eorum rationem reddere, causam proximam causasque occasionales exponere, & curationis praescribere consilia.

In ratione signorum designandâ, ea in Classes sortiri placet. *Classis prima*, priora tria signa, gradu tantum inter se discrepantia, complectitur. *Anorexiam* vel appetitus defectum ex ventriculi fibrarum muscularium atoniâ pendere a praegressis in physiologiâ fluit. *Nausea* major est ejusdem gradus, haud secus ac eam, *Vomitus* gradu etiam excedit. Hunc sedantibus excitari, eisque quae muscularium stomachi fibrarum tonum eò usque dirimunt, ut a viribus naturae medicatricibus reactio & vomitus provocentur, mihi verisimillimum & ferè certum videtur: namque vomitus plerumque vel ferè semper syncopen ex debilitate ortam comitatur; atque etiam stimulantia vomitionem non excitant, sed in genere optima ad eam compescendam vel obviam eundam praebent remedia, certe stomacho admodum grata inveniuntur: sedantes verò omnes potestates, frigus nimium, morbos asthenicos, opium copiosius adhibitum, famem diuturniorem, venena denique omnia & forsan antimonium eam excitare, ab omnibus conceditur.

Secundae classi tria etiam referenda signa reor. *Inflatio*. Aër actione ventriculi ex ingestis evolutus, viribus ejus ordinariis solet absorberi, neque enim eis vigentibus, magna illius copia evolvitur: Imminutis verò quomodocunque, minor fit absorptio, & aëris plurimum crescit quantitas. Quae cum ita sint maximè distendatur stomachus, necesse est, ita meherclè ut orificia sibi invicem appropinquent, nec facilè aër propellatur.

Compressione autem insolitâ versus cardiam, per aërem factâ, motus peristalticus adeò invertitur, ut aër ascendere finitur & *Ructus* constituitur.

De

Denique turbatâ ex praegressis ventriculi actione alimenta non rite admiscuntur; quin etiam solidiora fluidioribus innatantia Cardiam irritant, & per oesophagum modo praedicto rejiciuntur; hoc *Ruminatio* audit.

Ad *Classem tertiam Cardialgia & Gastrodynia* rite referri videntur. *Illa* ex distentione cum sensu acrimoniae calorem excitantis pendet; & vel acri aliquo admoto, vel erosione vel nimia cardiae sensibilitate oriri videtur. Acida autem praecipue in ventriculo inventa quae hoc signum cieant ex actione ejus imminutâ sine quo acidum ut antea dixi vel prorsus non generatur vel saltem citius absorbetur, pendent. Ad *hanc* referri potest omnis ventriculi sensus dolorificus non a praegressis ortus: ei forsan contractio muscularium fibrarum spastica, debilitate orta causae est.

Symptomatis omnibus ordinariis jam recensitis restat quae saepius accedit, *alvi adstrictio*. Hanc ab imminutâ ventriculi (& intestinorum praecipue ex illo ortâ) actione non raro oriri nullus dubito, quia in debilibus, in faeminis & in illis qui morbo & intemperantiâ confecti sunt symptoma frequens & pene intolerabile invenitur.

His igitur consideratis causâ proxima neminem potest latere. Omnia signa ad fontem unum, omnibus communem ex manifesto prosecutus sum. Itaque omnia unam eandemque causam proximam procul dubio agnoscunt, ventriculi scilicet Atoniam. Hanc quidem pro causâ accipere, nil moror; jamque ad *excitantes vel remotas* exponendas accingor.

Haec duplices sunt. 1°. Quae in ipsum ventriculum statim agunt.

Potestates sedantes seu narcoticae.

Stimulantia & Tonica nimis usurpata.

Relaxantia.

Nimia Ventriculi distentio.

Absentia solitorum stimulorum.

2°. Quae Ventriculum interventu cerebri, nervorumque afficiunt. Scilicet vel universa, vel saltem in partibus cum ventriculo praecipue consentientibus vis nervosae imminutio.

C

Quod

Quod in DIAGNOSI praecipue est difficile, Idiopathicus scilicet sit morbus an aliâ pendens affectione primariâ ne minimi quidem est momenti; curationis enim in utroque casu idem est consilium; eadem remedia.

PROGNOSIS a Poëtâ optimè designatur.

„ Principiis obsta, serò medicina paratur.

„ Cum mala per longas invaluere moras.

M E D E N D I C O N S I L I A:

Dyspepsia licet saepissimè sympathetica, nullâ ad primariam affectionem habitâ ratione tractetur oportet: Etenim roborato ventriculo corpus bene nutritur, functiones vigent & valent, tonus ubique corpori redit.

I N D I C A T I O N E S S U N T.

- 1°. Causas Remotas quam maxime vitare vel eisdem obviam ire.
- 2°. Signa graviora levare vel tollere.
- 3°. Tonum & Vigorem ventriculi restaurare.

C A U S I S R I T E C O N S I D E R A T I S , Q U A E V I T E N - T U R V E L I M P E D I A N T U R V I A P A T E T.

Secundae indicationi ea quae sequitur multum inservit, nam atoniâ sublatâ, signa quae ejus sunt effectus, tollentur. At vero quomodo unicuique signo obviam eatur, paucis exponam. Emetica leniora & ad ventriculum, rebus non concoctis oppressum, sublevandum, & ad stimulandum (*d*), rite adhibita plurimum profunt. Hinc Anorexia &c. ex imperfectâ concoctione & imminutâ actione
orta,

(*d*) Vomitus enim licet causis sedantibus ciatur, ipse multum stimulat. Hinc nimio emeticorum usu Dyspepsia movetur & augetur.

orta, hinc inflatio caeteraque omnia signa, quam optime levantur. Si vomitio haud ita temperata sit, paulo spiritus vini gallici potest cedere; vel si gravius illa urgeat, sal medius adhuc effervescens fumatur; vel denique his frustratis ad opium interne vel externe sub formâ cataplasmati adhibitum, & ad epispastica epigastrio applicanda, confugiendum est. In cardialgiâ ab acido ortâ, diaetæ acescentis, liquorumque fermentatorum (praesertim vero si fermentatio adhuc sit imperfecta) usus caute est evitandus; cibus igitur animalis cum re farinaceâ & lacte, & vina fortiora (atque etiam alcohol satis dilutus) anteponenda sunt. Denique absorbentia, scilicet alkali, & terrae calcareae optimi sunt usus: Illud contra acida plurimum valet, propria tamen incommoda sua secum fert, itaque hae imbecilliores licet melius praescribuntur. Si cardialgia ex erosione vel nimia sensilitate partium pendet, demulcentibus optime utimur.

Si ex inflatione &c. gravissime se gerat aliquis carminativa adhibeantur oportet. Si ex Gastrodyniâ stimulantia & antispasmodica; Alvi adstrictionem laxantia eccoprotica (namque omnis vitanda est purgatio) amoveant: & de iis Rhabarbarus, Oleum Ricini, Sales neutri, Aloes & Sulphur praestare dicuntur; oleum vero ricini & sulphur primum tenere videntur locum.

Quae Tonum ventriculo restaurant sunt vel *stimulantia*, aromata, salina & praecipue acida non fermentabilia, fossilia scilicet, & ex vegetabilibus distillatione extracta (inter quae aqua picea a CULLENO praefertur) necnon sal ammoniacus & communis qui huic indicationi inservire videntur; vel *Tonica*, amara, cortex scilicet Peruvianus, radices colombo & gentiana, flores chamamaeli &c. & denique praeparata ex chalybe & ferro. Cum vero inter debilitatis causas stimulantia & tonica incaute adhibita rite revera numerantur, quippe quae vires corporis fatigant & conficiunt, maxima debetur cura ne nimio eorum usu quam avertere conamur, debilitatem augeamus.

Quae stomachum interventu sympathiae roborant sunt exercitatio, praesertim equitatio, & frigus.

HYPOCHONDRIASIS a praegressâ, statu animi & temperamentorum varietate fecernitur. Nihil enim aliud est CULLENO teste, quam „Dyspepsia cum languore, maestitiâ & metu ex causis non aequis, in temperamento melancholico.

Corpus animumque humanum mirè consentientes a se invicem mutuò pendere nemo ut opinor inficias ire possit. Corpore valido, animoque vigente, sperat homo, audet, laetatur; debilitato systemate contra despondet, metuit, moeret, torpet. In variis verò temperamentis varius est iste consensus, & exinde praecipuum oritur discrimen Dyspepsiam inter & Hypochondriasin. Discrimina tamen sunt alia minus notabilia. Appetitus saepissimè hâc non deficit, non raro mirum in modum intenditur, ita ut non immeritò morbi signum habeatur. Hujusce causam ab acido, frigore aliisque istiusmodi qualitatibus ortam accipere nolo; melius forsan modo sequenti explicari potest. Ex contractionibus fibrarum ventriculi muscularium pendere appetitum supra posui; *sensus* autem *satietatis* a distentione quâdam & repletionem fieri potest: In Hypochondriasi in appetitum sufficit, ut mihi videtur, actio, distentioni verò ob nervorum torporem satietatis minimè subit sensus. Necnon in hypochondriasi alvus semper pertinaciter adstringitur, in dyspepsiâ nonnunquam soluta est.

Causâ hujus morbi proxima aliquantum quoque ab illius discrepat; Atoniam enim ventriculi dyspepsia, torporem vis nervosae stomacho praesertim infestum hypochondriasis agnoscit. Hâc actio potius tarda, illa debilis est. Atoniam autem cum torpore vel imminutâ nervorum mobilitate proprius connecti, atque etiam eisdem planè causis gradu variantibus aliquando nasci, docet illa frequentissima ex statu atonico ad paralyticum Rheumatismi transitio; unde peritus ille & assiduus rei medicae cultor, praeceptor meus, idemque amicus honoratissimus A. DUNCAN, M. D. in praelectionibus suis EDINBURGI habitis Rheumatismi speciem vel potius stadium nomine Paralyticum agnoscit.

Causae remotae etiam ab eis quae dyspepsiam inducunt vel re ipsâ
vel

vel operandi modo discrepant: Illae saltem in hypochondriasi animum potius quam corpus aliquo modo primariè afficere videntur. Et exinde fit quod studium intensius, nimia venus, ebrietas &c. inter hujusce affectionis causas, plurimum valent.

DISTINGUITUR hypochondriasis ab Hysteriâ ratione temperamenti, sexûs & aetatis: Hysteria scilicet praecipuè faeminas, aetate juniores & temperamento *sanguineo* (*e*) praeditas invadit. Ad Hypochondriasin homines plerumque aetate proveciores, & temperamenti melancholici (*f*), procliviores sunt.

EVENTUS pessimus: namque morte miserrimam finire vitam quam nobismetipsis infelicissimi, amicis dolorem simul atque commiserationem moventes, omnibus onus, eandem agere, melius & longè desiderabilius existimo.

CURATIONIS CONSILIA, mutatis mutandis fere eadem sunt ac in dyspepsia. Causae occasionales vitentur; levantur signa; excitetur potius quam restauretur tonus. At verò de animi demissi tractatione hoc in loco pauca dicantur oportet. Contra metum maestitiamque miseras hujus morbi victimas afficientes nihil omnino prodest, saepius nocet, ratiocinium. Nihil aliud igitur restat quàm attentionem aegroti ad res alienas convertere, animumque ejus ad studia diversa admoveere, ità ut a suâ ipsius conditione, quam miserrimam credit, quamplurimum abstrahatur. Huic consilio ante omne remedium peregrinatio convenit: nec non omnis citra fatigationem vel anxietatem occupatio, (voluptates, motus corporeus &c.) animi nimiam impediendo attentionem, maximè prodest. Quod ad caetera attinet, observationem vix meretur, quod loco laxantium, pur-

(*e*) Hujusce temperamenti signa, scilicet 1^o. sensilitas major; 2^{do}. animus facile excitus, & sponte varius & mutabilis; 3^{io}. habitus plenior &c., mobilitatem cerebri nervorumque auctam indicant.

(*f*) Hujus signa sunt 1^o. sensilitas imminuta 2^{do}. animus excitari difficilis, 3^{io}. impressiones diu retentae. 4^{to}. attentio constans rem in unam diu impensa. Quae mobilitatem minorem indicare videntur.

purgantibus magis stimulantibus, utamur oportet. Loco etiam vegetabilium vitandorum, diaeta saltem aequè ex animali, vegetabili-
que materiâ, forsan ex hâc omnino, conferta anteponenda est.

Omnia quae genus humanum invadunt, maximè lamentabilis, plurimis stipata miseriis, *CHLOROSIS* evadit. Quis enim tene-
ram & prorsus amabilem virginem, optimas homini delicias, vitae
ejus aerumnas quae leniat & compeſcat, vitamque ipsam quae sola
reddat laetabilem, morbo perquam crudeli succumbentem, decus
formamque quibus heri omnes captaverat, abreptam dolentem, sine
horrore possit videre? Hebetant vires; deficit animus; vividus fu-
git facie rubor! Incedunt in corpore macies & aſthenia; in animo
maeror; in ore pallor; & inmani prorsus saevitiâ grassantur! Fun-
ctionibus omnibus impeditis, concoctione ciborum imperfectâ, ge-
netalium tono amisso, miserrima aegrotâ nec respirat bene, nec rite
sentit, nec nutritur, nec demum vitae socialis gaudiis fruatur: Vi-
talibus enim hostilia oriuntur dyspnoea, aſthma, palpitatio, synco-
pe: Naturalibus, dyspepsia vel rei non esculentae desiderium, affe-
ctiones hystericae, menstruorum retentio, secretiones fere omnes
impeditae: Animalibus, aſthenia atque ejus innumerae sequelae,
quales sunt hydropes varii, cachexiae &c.

Haec omnia ventriculi relaxationem sive atoniam, genitalia ali-
quo modo unâ afficientem pro causâ proximâ agnoscunt; causas igi-
tur remotas & curationem eandem esse ac in dyspepsia satis liquet.

Appetitûs depravatio vel rei non esculentae desiderium, utpote
signum huic morbo proprium hic debet notari. A laesâ forsan ima-
ginatione, nimiae indulgentiâ, praesertim ubi ad ventriculum diu
male se habentem plus justo attenditur saepe plurimum oritur: at
vero a statu ventriculi non raro pendet & tum salubris est; Quum
stimulos vult solitos, vel necessarios, vel ubi acido praegravante,
absorbentes requiruntur, aliquando etiam ex debilitate spasmos &
actiones irregulares excitare consuetâ, pendet.

De curatione hoc tantum liceat addere, quod si remedia sint, &
taliter esse nullus dubito, quae reverâ vim possident emmenagogam,
hoc

hoc in morbo, amenorrhoeâ nunquam non comitato, imprimis necesse est adhibeantur.

DE PYROSI utpote morbo, cujus historiam ab auctoribus descriptam raro inveni, perpauca possum dicere; & meherclè eam omnino omisisse, magis placeret, si ab illustri CULLENO in nosologiâ methodicâ inter genera morborum posita, mentionem postulare non videretur. Cognoscitur dolore Epigastrii urente, cum sensu plerumque constrictionis & cum morfu ventriculi. Cum his etiam una, humor aqueus plerumque e stomacho ejicitur.

A cardialgia dignosci potest cum doloris natura & gradu, tum sensu constrictionis. A gastrodynia dolore urente & humoris aquei ejectione; a gastritide statu pulsus arteriarum, febre hanc semper comitante, & doloris, vomitusque in utrisque varietate.

Causa remota praecipue esse videtur acrimonia quaedam quae plerumque a cibo acescente, rancido, empyreumatico orta est. Causa proxima est ductuum eorum e quibus liquor gastricus solet effundi, constrictione spasmodica; qua revera nullae nisi tenuiores ejus partes possunt evadere, quamobrem ad spasmum illum tollendum a viribus naturae medicatricibus cieri videtur vomitus.

Curatio, CULLENO judice, difficillima est. Remedia quae in dyspepsiâ fuerunt commodo vel nihil omnino profunt, vel saltem admodum incerta sunt, acrimonia ab ingestis ducta vitetur; orta vero per emetica leniora, quae & spasmum forte solvant, forsân amoveantur, si morbi causa non appareat, opium & antispasmodica adhibeantur necesse est. Cicutae usum in hoc morbo plurimum commendare audivi virum ingeniosum ADAIR CRAWFORD Londini remedicam feliciter exercentem.

S E C T I O I I.

De affectionibus Symptomaticis.

Ventriculum sensibile admodum esse organum, & cum pluribus corporis partibus consentire jam dudum observavi, & mehercle affectiones inde ortae medicamentorum usum, & medici attentionem vix minus poscunt quam affectiones idiopathicae.

DE CONSENSU PARTIUM IN GENERE.

Corpus humanum eâ ratione constituitur ut variae ejus partes variaeque actiones ad finem certum conspirant. Functiones omnes in muneribus suis perficiendis se invicem plurimum juvant, neque pars aliqua possit affici quin aut totum corpus, aut partes quae communi cum eâ funguntur munere, affectionis participes factae, mutationes quasdam subeant.

Organa, quorum interventu, affectiones partis cujusdam in totum corpus praecipue diffunduntur, sunt cerebrum & ventriculus; cutis etiam & tela cellulosa eidem plurimum inserviunt officio. Partes quae sibi invicem praecipue consentire videntur sunt oculus alius cum alio; retina cum uveâ; uterus cum mammis; pulmones cum diaphragmate; cum ventriculo fauces; partes aliae tubi alimentarii cum aliis &c. Pleraeque hae sympathiae naturales sunt & cum ad actiones varias rite perficiendas, tum ad sanitatem partium & vitam denique ipsam totius machinae servandas conducunt. Aliae autem sunt quae nisi corpus morbo afficiatur, observari non solent. Utrumque genus tamen explicatu est satis difficile, eae quibus cerebri nervorumque systema universum inservit, ex eorum ubique diffusâ potestate, partes inter se, licet longe distantes, neciente, pendent. Quas Ventriculus &c. promovent ex eorum maximâ sensibilitate non minus quam e cerebro per nervos complures quibus instruuntur,

tur,

tur, eis connexo, oriri videntur, caetera omnes quae speciales dici possunt vel a vicinitate partium, vasorum sanguiferorum communicatione, nervorum nexu, membranâ cellulosâ ab aliâ ad aliam extensa, vel a consuetudine nascuntur. Ex sympathiis morbosae aliae ab auctâ partium sensibilitate, mobilitate & debilitate, aliae a viribus corporis autocraticis videntur oriri.

DE SIGNIS A FEBRE ORIUNDIS.

In omni febre universae corporis functiones plus minus impediuntur, nec inde stomachus, affectionis particeps factus, minimè quidè patitur: appetitus deficit, nausea & vomitus sequuntur. Ventriculi nimirum fibrarum muscularium tonus, sine quo nulla ei est actio valida & regularis a totius statu systematis, & praecipuè extremorum cutis vasculorum pender; vascula verò ea in febre fieri solent atonica; & exinde duci videntur ventriculi tonus imminutus, functiones languidae, aliaeque supra dictae affectiones.

Ad haec levanda symptomata, febrisque ipsius crisin promovendam, emetica leniora plurimùm valent; caetera autem remedia quae tonum vasculis restaurare in febribus, adhibentur, ventriculum quoque non minus levant.

DE SIGNIS A PODAGRA ET HAEMORRHOIDE ORIUNDIS.

Affectionem articulorum inflammatoriam quae hunc morbum praefertim constituit, varia praecedunt signa; praecipue autem ventriculus affici solet: impeditur appetitus, concoctio ciborum male perficitur, sequuntur inflatio, ructus, caeteraque istius modi symptomata, & per aliquot dies majore vel minore grassantur violentiâ. Die autem paroxysmum statim praecedente, appetitus plerumque reddit, & praeter solitum augetur. Saevientibus vero in *podagrâ regulari* paroxysmis, ni illi saepius fuissent repetiti, organum hoc

nequaquam solet affici. In eâ autem quae atonica audit, ventriculus praecipua morbi sedes est: Dyspepsiae & Hypochondriasis signa quam plurimum inducuntur; variaeque corporis partes spasmis ructu se sublevantibus afficiuntur, nulla tamen inflammatio insequitur. In *retrocedente* podagrâ, ventriculus non raro simili omnino modo, praecedente tamen, plerumque articulorum, inflammatione, corripitur. Podagrae atonicae curationi inserviunt, causarum debilitantium evitatio cauta; & toni corporis universi & praesertim ventriculi & articulorum restauratio, hoc praestant remedia in dyspepsiâ antea praescripta: Quin etiam cum frigus corpori admotum in hoc morbo plurimum noceat, summo semper studio evitandum est. Denique epispastica articulis dolore immunibus applicata, & fonticuli partibus extremis inferioribus insiti, inter remedia numeranda sunt. Si podagra retrocedens ventriculum afficiat, stimulantibus, veluti vino; alkali volatili; aromaticis & cum eis opio utendum est: ubi vomitus insequitur largiores vini potus, primo aquâ diluti, postea vero integri, ad eum promovendum profunt; post aliquot vero tempus ad supra praescripta & praecipue ad opium confugiendum est.

Quod ad ventriculi ex HAEMORRHOIDE sympatheticas attinet affectiones, signa dyspeptica & hypochondriaca exinde orta, eodem modo ac si idiopathica essent tractari debent; remediis ad morbum primum depellendum adhibitis.

DE ALIIS QUIBUSCUNQUE VENTRICULI SYMPATHIIS.

Praecipuae hujus organi affectiones sympathicae sunt eae quae ab animi pathematibus, utero, & cute male affectis oriuntur, demisso scilicet vel turbato animo vires universi corporis labuntur; deficit praecipue appetitus; assumptus non concoqui potest cibus: exoriuntur nausea, vomitus, aliaeque dyspepsiae lugubria signa, quae nisi moestitia, aliave animi pathemata primo fuerunt amota, ne arti quidem Machaoniae volunt cedere.

Ven-

Ventriculi cum utero consensus grave exemplum praebent fac-
minae, quae paullo post conceptionem nausæa atque etiam saepis-
sime vomitu, omni mane fatigantur & excruciantur. Dira meher-
cle signa sunt & pene intolerabilia, nullis autem remediis, non
nisi patientiâ levanda. Catameniorum etiam variae affectiones &
status, stomachum plurimum afficiunt. Retentis enim his ex uteri
atoniâ dyspepsia & chlorosis, ex quâvis causâ suppressis vel etiam
difficilibus redditis, dolores stomachi, vomitus, haematemasis
sequi consueverunt. In hisce affectionibus indicationes omnino
dissimiles sunt. Si vasorum uteri deficiat actio, excitetur; sin
actione integrâ, augeatur resistentia, ea minuatur, excitatâ simul
actione, necesse est.

Cutem inter & stomachum consensûs exempla sunt signa in fe-
bribus prius tractata. Tono autem quomodocunque in vasculis ex-
tremis amisso vires ventriculi statim deficiunt, restaurato redeunt.
Quin etiam in exanthemate, omnique cutaneâ eruptione ventriculus
quam plurimum solet affici: cum vero eae vel ex frigore vel ex aliâ
quâpiam causâ retropulsae sunt, tùm malè in hoc organum inci-
dentes praecipuam ei injuriam inferunt. Symptomata inde orta re-
mediis vix cedunt, nisi prius restituatur prior cutis status: quod
quidèmbalneo tepido, stimulantibus internè exhibitis, eisque quae
impetum humorum ad superficiem corporis adaugent, plerumque
fiet. Sanguinis autem missio aliquando & necessaria est & plurimum
prodesse invenitur.

Dura, scilicet haberi solet necessitas, de quâ nihil omnino com-
modi possit deduci. Mihi tamen, perquam cupienti, quo beneficia
quae nunquam me penes erit retribuere, possem agnoscere, & prae-
cipuè quo studiorum fautoribus meorum gratias referam, praesens
favere videtur occasio. Quòd medicinae ingressus sim scientiam,
& quod in re medicâ lucri quid & fidei liceat prospicere, carissimo
& benignissimo fratri meo S. B. ATHILL, M. D. debere luben-
tissime fateor: mihi enim, cum jam alium vitae cursum minus tamen
lucri secum allaturum, saltèminus certum elegi, frater ille gene-

rosus, quamprimum idoneam sibi nactus est occasionem, sui instar, medicae suae exercitationis fructuum ultrò mihi obtulit participationem; tempestiva ea benevolentia indolis ejus ergà me fraternae fida est historia. Tum verò honori & utilitati meae praecipuè consuluit, quum D. A. DUNCAN Edinburgensis (nominis mihi semper carissimi) judicio & hospitiiis medica mea studia commendavit; laudem enim eam, si qua mihi unquam fuerit in medicinâ, principiis iis, quae discipulus & contubernalis ejus dulcissimè imbui, jure referre volo. Praeceptor assiduus unà erat idem & amicus suavis: tempora meherclè ea, cum viro illo erudito & benevolo, ità acta juvat meminisse; honestior verò fit, & in dies praetiosior amicitiae tantae gloria.

Tibi demum hodie, digne mî Curator & Patrone, Domine, R. OLIVER, summâ cum reverentiâ, & estimatione & amore, filium veluti tuum me liceat propinquare. Si enim infans, puer aut adolescens honestum quid aut decorum assequi conatus sim, tui est: tibi nimirum teneros nostros annos & curas & anxietates omnes paternas suas, absente se, pater feliciter confidit prudentissimus; & pari optimus ille parens judicio, suorum nunquam immemor, &, quo carissimae vitae suae exitus quam levissimus, & quàm minimo suis foret incommodo, ritè consulens, tibi aliisque amicis propinquissimis post mortem suam, res & liberos suos fore commissos voluit: Curatores reverà fidissimos & amicissimos invenimus; sed de tot & tantis, in me meosque confertis, beneficiis, dignè ea quae sentio, nequaquam me penes est exprimere; & mehercle seu civis privatus, seu senatûs socius Britannici respiciatur, aut honoratiores aut celebratiores haud facillimè esse poterunt integritas tua, & virtus publica. —

T A N T U M.